

i FLETËUDHËZUES I PAKETIMIT:
Informacion për pacientin

ZITARA

Tableta të veshura me film – 500 mg
(Azitromicinë dihidrat)

Lexojeni me kujdes këtë fletëudhëzues përpara se të filloni përdorimin e barit.

- Ruajeni këtë fletëudhëzues. Mund të keni nevojë ta lexoni përsëri.
- Në qoftë se keni pyetje të mëtejshme, pyesni mjekun ose farmacistin tuaj.
- Ky bar është përshkruar për ju. Mos e jepni tek persona të tjerë. Mund t'i dëmtojë ata edhe pse mund të kenë të njëjtat simptoma si ju.
- Në qoftë se ndonjë prej efekteve anësore keqësohet ose në qoftë se vëreni ndonjë efekt tjetër anësor që nuk përmendet në këtë fletëudhëzues, ju lutemi të njoftoni mjekun ose farmacistin tuaj.

Në këtë fletëudhëzues:

- Çfarë është Zitara dhe përse përdoret
- Përpara se të merrni Zitara
- Si ta merrni Zitara
- Efekte anësore të mundshme
- Si ta ruani Zitara
- Informacion i mëtejshëm.

1. ÇFARË ËSHTË ZITARA DHE PËRSE PËRDORET

Tabletat e veshura me film Zitara përmbajnë si lëndë aktive azitromicinë dihidrat, ekuivalente me 500 mg azitromicinë.

Azitromicina bën pjesë në grupin e antibiotikëve makrolidë.

Indikohet në trajtimin e infeksioneve të shkaktuara nga disa baktere apo mikroorganizma të tjerë si:

- infeksione të rrugëve të frymëmarrjes (bronkit, pneumoni, faringit, tonsilit, sinuzit);
- infeksione të veshit;
- infeksione të lëkurës dhe indeve të buta;
- infeksione urogenitale të shkaktuara nga Chlamydia trachomatis.

Mjeku juaj mund ta ketë dhënë Zitara për një qëllim tjetër. Pyesni mjekun tuaj në qoftë se doni të dini pse ju është dhënë ky bar.

2. PËRPARA SE TË MERRNI ZITARA

Mos përdorni Zitara në qoftë se:

- keni mbindjeshmëri ndaj azitromicinës, antibiotikëve të tjerë makrolidë, si eritromicina, klaritromicina ose ndaj ndonjërit prej përbërësve të tjerë të tabletës; reaksioni alergjik mund të shfaqet me skuqje të lëkurës dhe fishkëllimë të mushkërive;
- keni dëmtim të funksionit të mëlçisë;
- jeni duke marrë derivate të ergot-it, si ergotamina, që përdoren për trajtimin e migrenës.

Në qoftë se mendoni se keni ndonjë nga gjendjet e përmendura më sipër, këshillohuni fillimisht me mjekun tuaj dhe ndiqni këshillat e dhëna.

Tregoni kujdes të veçantë me Zitara

Mjeku juaj duhet të jetë në dijeni nëse keni një nga gjendjet e mëposhtme:

- dëmtim të funksionit të veshkave;
- probleme të zemrës.

Marrja e barnave të tjera

Njoftoni mjekun tuaj nëse jeni duke marrë një nga barnat e mëposhtme:

- ergotaminë;
- varfarinë ose antikoagulantë të tjerë;
- ciklosporinë (përdoret si imunosupresor pas transplantit të organeve ose palcës së kockave);
- digoksinë (përdoret në trajtimin e insuficiencës së zemrës);
- teofilinë (përdoret në trajtimin e astmës);
- terfenadinë (antialergjik);
- antiacide (në këtë rast azitromicina duhet marrë 1 orë përpara ose 2 orë pas marrjes së antiacideve).

Njoftoni mjekun tuaj nëse jeni duke marrë edhe barna të tjera, përfshirë ato që mund të merren pa përshkrimin e mjekut.

Marrja e Zitara me ushqim dhe pije

Ky bar duhet të merret 1 orë para ose 2 orë pas ushqimit.

Shtatzënia

Në qoftë se jeni shtatzënë ose planifikoni të ngeleni shtatzënë, njoftoni mjekun tuaj përpara se të merrni këtë bar.

Ushqimi me gji

Në qoftë se ushqeni fëmijën me gji, njoftoni mjekun tuaj përpara se të merrni këtë bar.

Drejtimi i automjetit dhe përdorimi i makinerive

Nuk parashikohet që ky bar të ndikojë në aftësinë për të drejtuar automjetin apo për të përdorur makineri. Megjithatë, efekte të mundshme anësore, si marrje mendsh, duhen marrë në konsideratë kur kryhen këto aktivitete.

3. SI TA MERRNI ZITARA

Tabletat duhen marrë ashtu siç ju ka udhëzuar mjeku. Në qoftë se nuk jeni të sigurtë për mënyrën e marrjes së tabletave, këshillohuni me mjekun ose farmacistin tuaj.

Të rriturit

Në infeksionet urogenitale pa komplikacione, të shkaktuara nga Chlamydia trachomatis doza është 1,000 mg, e cila merret si dozë e vetme. Për të gjitha indikacionet e tjera, doza është 500 mg, e cila merret si dozë e vetme, për 3 ditë (doza totale 1,500 mg). Si alternativë, doza totale (1,500 mg) mund të jepet për një periudhë 5-ditore përkatësisht 500 mg ditën e parë dhe më pas 250 mg ditë e tjera.

Të moshuarit

Mund të përdoren dozat e përshkuara për të rriturit.

Fëmijët

Ky bar indikohet vetëm në fëmijët që peshojnë më shumë se 45 kg. Në këtë rast mund të përdoren dozat

e përshkuara për të rriturit. Për fëmijët që peshojnë më pak se 45 kg, mund të përdoren forma të tjera të azitromicinës (si p.sh. pezullitë).

Në rast se pacienti ka dëmtim të funksionit të mëlçisë ose të veshkave, mjeku mund të ndryshojë dozën. Flisni me mjekun tuaj nëse vuani nga ndonjë prej sëmundjeve të përmendura më sipër.

Në qoftë se keni marrë më shumë Zitara

Në qoftë se keni marrë më shumë Zitara se sasia që duhet të merrni, ose në qoftë se fëmijët e kanë marrë gabimisht këtë bar, ju lutemi të kontaktoni mjekun tuaj, spitalin, ose të telefononi urgjencën për të marrë një mendim për rezikun dhe këshillë për veprimet që duhet të ndërmerren. Mbidozimi mund të japë: të përziera, të vjella, diarree dhe probleme me stomakun.

Në qoftë se harroni të merrni Zitara

Në qoftë se harroni një dozë, merrni dozën në vazhdim kur të jetë koha për marrjen e zakonshme të saj.

Mos merrni një dozë të dyfishtë për të plotësuar dozën e harruar!

Merrni tabletat përgjatë gjithë kohës së trajtimit.

Në qoftë se trajtimi ndërpritet më herët sesa duhet, infeksioni mund të rikthehet.

Në qoftë se keni pyetje të mëtejshme mbi përdorimin e këtij produkti, pyesni mjekun ose farmacistin tuaj.

4. EFEKTE ANËSORE TË MUNDSHME

Të gjitha barnat mund të shkaktojnë efekte anësore. Ndonjëherë ato janë serioze, shumicën e herëve jo. Mos u alarmoni nga kjo listë e efekteve anësore të mundshme. Mund të mos ju shfaqet asnjë prej tyre. Disa efekte anësore mund të shfaqen në fillim të trajtimit dhe të zhduken spontanisht gjatë vazhimit të trajtimit. Efektet anësore janë të renditura më poshtë sipas shpeshtësisë së shfaqjes së tyre.

Të zakonshme (shfaqen në më shumë se 1 në 10 pacientë)

çrregullime dhe krampe të stomakut, ndjenjë e të qenit jo mirë, diarree.

Të pazakonta (shfaqen në më pak se 1 në 100 pacientë por në më shumë se 1 në 1,000 pacientë) humbje oreksi, çrregullim i shijes, fryrje dhe probleme me tretjen, kuarje vaginale, skuqje dhe kuarje të lëkurës, dhimbje të kyçeve, të përziera, vertigo, dhimbje koke, përgjumje, të fikët.

Të rralla (shfaqen në më pak se 1 në 1,000 pacientë, por në më shumë se 1 në 10,000 pacientë):

mpirje ose ndjenjë shpimi, shtim të sensibilizimit të lëkurës ndaj diellit, skuqje dhe deskuamim të rëndë të lëkurës, rrahje të shpeshta dhe të çrregullta të zemrës, hipotension, kapsllëk, inflamacion të zorrëve, ndjenjë këputjeje, çngjyrosje të gjuhës, infeksione mykotike të gjuhës dhe vaginës, inflamacion të pankreasit (pankreatit), inflamacion ose insuficiencë renale, hepatit, ndryshim të niveleve të enzimave të mëlçisë, zverdhje të lëkurës dhe të syve (ikter), insuficiencë hepatiske, nervozizëm, irritim, pagjumësi,

të ndjerit hiperaktiv, ulje ose humbje të përkohshme të dëgjimit, zhurmë në veshë, ulje të numrit të ruazave të bardha të gjakut.

Njoftoni mjekun tuaj në qoftë se ndonjë prej efekteve anësore të përmendura më sipër ju shqetëson. Në qoftë se vëreni efekte anësore që nuk janë të përmendura në këtë fletëudhëzues, ju lutemi të njoftoni mjekun ose farmacistin tuaj.

5. SI TA RUANI ZITARA

Mbajeni larg fëmijëve!

Mos e përdorni Zitara pas datës së skadencës e cila është e shënuar në paketim.

Të ruhet nën 25°C!

6. INFORMACION I MËTEJSHËM

Çfarë përmban Zitara

Lënda vepruese është azitromicinë dihidrat. Çdo tabletë e veshur me film përmban azitromicinë dihidrat ekuivalente me 500 mg azitromicinë.

Përbërësit e tjerë janë: amidon i prexhelatinizuar, hidrogjenfosfat kalçiumi anhidër, kroskarmelozë natriumi, povidon K 30, dioksid silici koloidal, stearat magnezi, laurilsulfat natriumi, Opadry II i bardhë.

Përmbajtja e paketimit

Kuti me 3 tableta të veshura me film.

Shpjegues i ikonave ilustruese për paketim:



Sipas recetës së mjekut.



Përmbajtja.



Forma e tabletës.

Mbajtësi i autorizimit për tregtim (MAT) dhe prodhuesi:



PROFARMA Sh.a.
Rruga "Myslym Keta"
Tel.Fax: 00 355 4 23 62 800
Tiranë - SHQIPËRI

Ky fletëudhëzues u rishikua për herë të fundit në Janar 2015.